

Jus Mon Endi Połpu Gos Wumb Kin Kindim

Jus Pułum Mon Ei

¹ Na Jiisas kin ekii sip kin, eim nge kongun wu mołup kin, nanim Jeims nge angim moł. Na mon ei połup kin, wumb ombu Gos eim wii topu “Nanim kin ekii sik nanim nge wumb mułngii,” pa ninim, wumb ei kin nognd. Ngop kin, wumb ombu enim, Erinjpin Gos nge noman ngołum oł ei nge, piram mułangin kin, nga enim Jiisas Krais eim angił ełe tep ka erang mołmun.

² Pe Gos eim kaplı enim kin kaimb sipi kin, nga eim erang enim noman tukrung emin ka seng kin, nga eim am enim kin noman kułpu ngołum oł ombu ei, enim kin pei mendpił tonu opu pengli!

Gos Nge Ek Ka Opu Orung Wumb

³ Na angnan noł mendpił, nanim enim kin noman to piip kin, mon pułmbii ni piinj mon ei, pe puls. Puls mon ei, Gos eim sinim si orung simba ei, pe na mon ei połup kin, enim kin ngond. Na nemb enim paki tang kin, enim nge pii gii ei ambił gii nik dinga kindik kin wumb ek kend tok kun pinałim mił nik kin, andan to ngołmun wumb ei kin kan kun erik mułngii. Molk kin, kunum endeim mendpił Gos eim sinim pii gii wumb pei kin ngum pii gii ei, tep ka erpin kin dinga kindpin kin, pii gii ei ambił gii ni mułmun.

⁴ Nanim ek ei mił nip ngond ei, nimbil erang wumb kombur ek kend kun pinalim wumb ei koi erik molk kin, en enim, enim kin tep to mułmun. Molk kin en enim oł kun pinalim mił erngii ei, sinim Gos nge noman ka ngołum oł ei kin en enim to eipi eipi kindik kin oł eipi endi elmin. Erik kin, en enim oł kis kanim kanim ngenj noman kuł ngumba ni piik elmin. Erik kin en enim sinim Jiisas Krais Owundu sinim tep er mołum Owundu ei, en enim buł ngok kin yi elmin. Kumb ok Gos nge ek ka si, ni tor kindpi kin yi nirim. Wumb oł kis elmin ełe nge Gos kos owundu simba kunum ei en enim kumep kis singii ei sim sałim.

⁵ Pe nga na enim nemb piingii ei nge, enim ok piik kin, kanik enjing ei, Gos eim Esrel wumb Eisip mulnjung konu ełe, eim paki to se mengpi kin, Eisip konu tor tu wum. Tu wang kin, wumb ombu, eim kin pii gii ninenjing wumb ei, ekii se, eim to kondpu kis er si kindim.

⁶ Nga enim piingii ei, enjel en enim Gos ngopu kin, tep erik mułei, a nirim konu ełe, si kindik, yi erangin kin, Gos eim en enim ambilpi, sipi kin, konu endi kindang mołmun. Molk kin, ekii muł mei poru nimba kunum ełe, Gos eim sipi kan ngii mił kindang konu kis ełe, kunum kunum mułngii. Nimbil erang en enim Gos ngum kongun ei, mandi ełe erik mulenjing. Mularik kin, nga Gos en enim dinga ngopu ełe molk kin, tep erei, nirim ei mił, si kindnjing. Si kindangin kin, en enim Gos kos owundu piimba kunum owundu ei, eim enim konu kis ełe kindmba.

⁷ Ei yi mił ku, Sorom kin Gomora konu owundu tał nin, nga konu kombur orung orung mandi

sirim ei, enjel erik kin, oł kis enjing ei, dup opu nopus kin, konu kin, wumb ni pei, to kis erpi eipi eipi kindrim. Kindang kin, sinim noman to piipin mułmun ei, Gos wumb nii endi oł kis kun pinałim mił er andiłim ei, Gos eim wumb ei kin, oł yi ku erpi ngumba. Ngumba ei dup konu kis ełe, kunum kunum piram nop mułang kin, en enim ngenj kumbii kis singii.

⁸ Yi mił ku, wumb oł yi enjing mił ku, wumb ombu en enim or kumb min men mił kenjing ei, en enim nge ngenj ełe ok kis erik ełmin. Nga yi ku sinim Owundu nge noman dinga ei, en enim ek buł ambilk kin tołuł ełmin. Nga yi ku, en enim tonu epin konu ełe enjel ei nge, se ek kul sik yi erik ełmin.

⁹ Ba ok enjel owundu Maikel mołpu kin, kunum endi eim Gos nge opu orung wu kis Seisen kin ek mił erkił kin, Moses nge ngenj ei nikił, ek mił erkił, ba enjel owundu Maikel eim, ek endi nipi kin, Gos nge opu orung wu kis Seisen, “Nim oł kis kun pinałim mił en” pa ninerim mon; ba eim yi nirim, “Owundu eim nim ek dinga mendpił nipi kin oł kis en ełe nge ngonum,” nipi yi nirim.

¹⁰ Ba wu ombu en enim pei ei epi ombu, pii kun enałmin ełe nge, en enim ek kis nik kin, nga en enim epi pii kun enmin epi kanim kanim ombu, en enim kung owu mił, oł kanim enim ełe yi pałim ei, noman to piik enałmin mon. Oł ełe nge, en enim kin kumep kis ngopu kin to kis ermبا.

¹¹ Yi mił en enim kan kun erik mułngii! Nimbil erang en enim Gos kin ekii sinerim wu Kein, eim erim oł ei, en enim yi ku ełmin. Nga en enim ku nin epi simin ni piik kin, en enim erik oł ei mił

wu Beilim yi ku piipi eririm. Nga yi ku kumb ok
wu Kora eim ek dinga piipi kin ekii sineririm ei
mił ku, en enim yi ku erik kin, Kora eririm oł ei
mił Gos eim erpi kumep kis ngurum mił yi ku en
enim am puk kin, konu kis ełe pungii.

12 Yi mił wu ombu en enim mundun ming penj
mołum ei mił mołmun. Molk kin, enim men
ngii kuni owundu endi nungii ei nge, en enim
singambił kulanmin. Kularik kin, en enim nge
mendpił noman to piik kuni en enim mendpił
nonmun. Nok kin, en enim yi mił kupu muł endi,
jipił topu kin, nga konu tunarpi kin, konu pop
topu, sipnim ei mił; nga yi mił ku, ond endi angpi,
onguł pei topu kin, tengngii kunum mong top
mulałim ei mił ku; nga ond dumbuł pei kułii erpi
kin, kołpu numenj tonum ei, mił mołmun.

13 Nga en enim yi mił ep noł topu kin, ko wupu
onum mił, en enim oł kis kun pinałim mił enmin
ei yi mił. En enim noł wer ełe, noł milali kindpi
mołum ei mił, en enim singambił sik kin, oł kis yi
erik mołmun. Molk kin en enim yi mił kor kanjip
endi pupu kin ełe pepi ełe pepi, enim mił, yi erik
mołmun; ba Gos konu endi er sim sałim ei emii
mendpił peng mułngii.

14-15 Nga Einok eim ok yi mił nirim, wu ombu
ek kend tok kun pinałim ninmin wu ombu kin
tonu omba ek ei, piipi nirim. Andam tonu opu
multum nga Einok eim tonu opu mołpu kin, ek
nipi eririm ei, Andam nge buł morung wumb
tiłap angıl orung nga tał tonu ok mulk kunum ełe,
eim tonu opu mołpu kin ek ni tor kindpi kin, yi
nirim. Eim yi nirim, “Enim piyei! Owundu eim
kin, eim nge enjel pei tonu, kanjip mołum ei mił,

yi pei mendpił kaplı ongii,” pa nim. Yi erpi opu kin, eim kaplı wumb pei kii si orung kindpi kin, kos piimba. Piipi kin, eim pii gii ninanmin wumb ei, oł kis kanim kanim enjing ei, kii sipi kin, kos piimba. Piipi kin, nga ek kis kanim kanim endi, Gos kin ninjing kin, yi ku kii si ngopu kin kos piimba.

¹⁶ Wu ombu en enim kunum kunum nu gultam nik kin, en enim ełmin oł ei sipik kin, wumb eipi ełmin pa nik ełmin; nga en enim noman ełe, oł kis kun pinałim mił erii niłim ei, ekii sik ełmin. Pe nga en enim ek dinga nik kin, wumb piingii ei, “Sin sinim wumb owundu mołmun,” ni piingii nik yi ełmin. Nga en enim wumb eipi nge epi endi simin ni piik kin, kenim ni ełmin.

Enim Pii Gii Ambił Gii Ningii

¹⁷ Ba nanim nge wumb puł mił ei, enim piyei! Ok enim Jıisas Krais Owundu nge ek se andiłmin wu ombu ek ni tor kindnjing ek ei piingii!

¹⁸ Wumb ombu enim, enim kin yi ninjing, “Muł mei poru nimba kunum ei, wu kombur ongii ok pendik kin, enim kin tokuł erik ngungii. Ngok kin, noman to piinarik kin, oł kis ombu, ekii sik pungii,” pa ninjing.

¹⁹ Wu yi nge ombu, en enim erik kin, wumb sipik tiłap eipi eipi kindik kin, erangin mułngii. Molk kin, en enim noman ya mei ełe, wu noman pałim mił, ekii sik erik kin, punmun ei, Gos Gui Ka ei, en enim kin mulałim mon.

²⁰ Ba enim nanim angnan noł; enim noman tuk ełe dinga kindik kin, en enim pii gii kun ka pałim mił, dinga kindik mułngii! Molk kin, enim kunum

kunum prei erngii ei, Gos Gui Ka elege nge, prei erngii!

²¹ Nga en enim Gos noman kultum ol elege nge, enim kapli no pek mułngii! Yi erik kin, nga Jiisas Krais sinim Owundu nge kaimb sipi kin, sinim ngołum ol ei, peni elege tor ombo kunum ei, enim kunum kunum kui er mułngii.

²² Nga enim wumb kombur pii gii dinga pinerang mołmun wumb ei kin, kaimb sik kin pakitok yi erngii.

²³ Nga wumb ombu en enim dup konu kis elege mił mołmun ei, kapli enim sikir erik, si orung singii. Sik kin, enim kapli gał kulk kin, kaimb sik enmin ol ei nge, wumb kombur kin yi erik ngungii. Ngok kin, konduk ok nge penj mendpił mołum ei mił noman tuk ol kis sałim ei, enim kanik kun erik kin, buł ngok kin gał kulk mułngii.

Prei Erpin Ek Ka Nipin Gos Ngumun

²⁴ Pe nga Gos eim kapli enim kan kun erpi kin, se mułang kin enim bok tok orung puk kin, ol kis kun pinalim mił yi enerngii mon! Eim kapli enim si mengpi opu kin, eim tiłang dinga owundu ermba kumb elege tu wumba. Tu wang kin, enim nge ol kis endi pinerang kin, enim ka mendpił piik mułngii.

²⁵ Gos ei Gos endeim mendpił mołum ei sinim se orung sim pułwu ei, eim Jiisas Krais sinim nge Owundu ei, eim kongun erim elege nge, sinim se orung sipi kin, eim kin sim. Seng kin, sinim kapli eim embe kapli ambił tonu kindmin. Kindamin kin, eim kapli King Owundu mułmba ei, kapli dinga owundu mendpił sałim; nga eim epi kanim

kanim pei ei eim peng tep erpi mołum ei pułwu.
Eim kumb ok mołułum. Pe eim mołum ku; nga
ekii ei eim kunum kunum mołpu ba ku. Ei keimi!

**Gos Nge Ek Ka Ei Sinim Kin Ngolum
The New Testament in the Nii Language of Papua New
Guinea
Nupela Testamen long tok ples Nii long Niugini**

copyright © 1980 Wycliffe Bible Translators, Inc.

Language: Nii

Dialect: Central Wahgi

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

PDF generated using Haiola and XeLaTeX on 18 Mar 2025 from source files dated 31 Aug 2023

57529bce-9e23-5350-904d-243a1b359818